



DEO OPTIMO MAX.

UNI ET TRINO.

VIRGINI DEIPARÆ, ET S. LUCÆ

Orthodoxorum Medicorum Patrono.



QUÆSTIO MEDICA,

QUOD LIBETARIIS DISPUTATIONIBUS

manè discutienda, in Scholis Medicorum, die Jovis vigesima-quarta  
Januarii, anno M. DCC. XXXVII.

M. GABRIELE ANTONIO JACQUES,

Doctore Medico, Præsidente.

*An sanitas à solidorum & fluidorum æquilibrio?*

I.

ORGANA corporis in vasa simplicissima dividuntur, & tandem in villos, tanquam in stamina ultima, resolvuntur. Ex his mira congeries vestræ, chordarum, syphonum & machinamentorum statices, hydraulices, optices, &c. exurgit. Fluida vasis conclusa, tam indole quàm munere diversa, tuborum parietes villosque elasticos impellunt, tendunt, vibrant, à quibus vicissim aguntur ipsa, teruntur, subiguntur, vitæ fomitem quoquoersum sparsura. Omnia, si mutuum cerebri animæque imperium excipias, constantibus mechanicæ legibus reguntur. Virium oppositarum conflictus æquilibrium constituit aut inæquilibrium. Hæc in corpore humano sic elucescunt atque deprehenduntur, ut quidquid alibi miraculo proximum ars excogitavit, totum hoc in uno homine contraxerit artifex Deus, nobisque intelligendum proposuerit. Æquilibrium est mutua corporum æqualibus virium momentis in se contranitentium actio, quâ nec hoc nec illud corpus vincit vinciturque; quâ neutrum aut movet aut movetur: Inæquilibrium vero pendet ab inæquali virium in se mutuò agentium momento, quietis impatiente, motûs parente.

## I I.

**QUEMADMODUM** hujus aspectabilis mundi concentus atque harmonia, sic animati corporis functiones à vario partium in se invicem agentium nixu & renixu exurgunt. Corporis cujuscunque vires proficiſcuntur vel à motu, vel à gravitate, vel à cauſa gravitati æquipollente. Vires oppoſitæ ſe invicem deſtruunt ſi ſint æquales; neque enim movetur corpus, quod, quantum ab obſtante reſiſtentiâ repellitur, tantum à potentiâ impellente trahitur. Conſtans eſt hæc æquilibrîi norma ſive in ſtaticis, ſive in hydraulicis. Hoc mechanismo corpus tetano riger: Secus accidit ab inæquali virium momento. Nam corpus, cujus vis major, toto illo virium exceſſu movetur, quo corporis alterius obſiſtentis renixum ſuperat. Quid *inaquilibrîi* certius argumentum? Vis exemplum? Luculentum ſanè præbent epileptici, quibus artus inæquali & æternò lacertorum motu variè jaſtantur.

## I I I.

**COR** princeps corporis machina anthraciſ reciprocantis munere fungitur. Ex hoc, tanquam ex radice, arterioſa pullulant vaſa, unde ingens tubulorum minorum, ac minorum, in venas magna ex parte abeuntium, ſylva naſcitur. Duſtis venoſi, lymphatico-valvuloſi, nevo-lymphatici, nervei & ſecretorii quicunque ab elongatis arteriis, non ſectis ac rami ramuſculique ex arboris caudice ſoboleſcunt. Torum ſerè corpus duplex vas diverſimodè diviſum dices. Organa multiplicia conſtantur vaſis penicillatim diſpoſitis, reticulariter cœuntibus aut denique variè intertextis, nulliſque non fluido ſuo gravidis, quemadmodum rimante Ruſchio ac detegente, oculis eſt animadverſum. Fluida tubos replent, ampliunt, extendunt; tubi verò tum vi elatiſcà, tum actione tonicà ad contractionem indefinenter nituntur. Hinc continentium vaſorum & contentorum fluidorum nixus & renixus perpetuus: hinc virium contra nitentium pugna. Cordi ſeſe conſtringenti non liquores modò ſed & vaſa obſiſtunt, ut ſive cordis & vaſorum ad ſeſe invicem, ſive eorundem ad fluida ſpectes habitudinem, contranitentes ubique vires oppoſitaſque reſiſtentias nullibi non deprehendas. In hæc virium oppoſitarum luctà, nunc vaſa, atque adeo univerſa ſolida, cordis & fluidorum potentiâ cedunt, nunc & ipſa victricia, viciffim fiunt: ſic *inaquilibrîum* omnia regit, movet & damnoſæ quietis metum avertit.

## I V.

**CONTRAHENTIS** ſeſe cordis nixum totiuſque fluidorum molis renixum propius expiſcare. Villi cordis obliqui, tranſverſi, ſpirales, &c. perſeverante ſyſtole tenduntur, cordis cava undiquè ſtringunt & incluſum fluidum validè comprimunt: Fluidis autem è corde projectis, ne promoveantur, obicem ponunt liquores ubivis in vaſis contenti. Quæras forſan quamobrem? Reſpondemus id evenire tum à propriâ movendorum fluidorum mole, tum ab aſſiſtu ſecuturo, tum ab ambientium preſſione corporum, &c. Verùm ſe-

habitur interim cor, dicet quispiam? Minime: Cor enim repagula quæque su-  
 perat. Vis ejus, ob partium fluidi vasis contenti contiguitatem & mutuam pres-  
 sionem, ad ultima quæque & remotissima vasa sic diffunditur, ut præcurrenti-  
 bus fluidis calcar addatur, velocitas sanguinis toto contractionis tempore in-  
 tendatur, ac proinde secernenda fluida suos in tubulos copiosius deriventur,  
 Hinc in ranis, gyrinis, pisciculis, anguillis, &c. Sanguinis acceleratio quaque  
 cordis systole, microscopii ope, quam facillime detegitur. Eodem tempore  
 momento laxati ob prægressam fibrillarum nervearum compressionem lacerti  
 auricularum carnei, refluxo per venas sanguini patefunt, sitque auriculæ cordis  
 diastole, cordis systoli synchrona. Contractivâ cordis actione, pressis villis ner-  
 veis, laxantur tandem stamina carnea quo tempore projectus auricularum systole  
 sanguis, cordis sinus ampliat, parietes diducit, fibras carneas extendit; sic vi-  
 detur jam auricularum & projecti liquidi actioni obsequitur princeps organum,  
 donec contenti sanguinis impressione tanquam stimulo laceffitum novam obeat  
 systolem. Fluentium jam liquidorum & vasorum vires adverte. Liquidi in tubo  
 fluentis nifus secundum radios ab axe ad peripheriam ductos par est nifui se-  
 cundum axem. Ergo quo tempore cor constringitur, impulsa fluidorum moles  
 & celerius circumducta fortius agit in vasorum latera, unde vasorum contra-  
 ctiva vis intentiori potentia cedit, elastici arteriarum villi in circulos majores  
 elongantur, ductus secretorii aperiuntur magis & alveo latiore humores exci-  
 piunt. Hæc continentium vasorum contentorumque liquidorum incrementa;  
 vel in vasis abducentibus inconspicua licet, fieri probant, tum hydraulica, tum  
 pulsantium venarum quadam exempla. Quid quod universas corporis partes  
 pulsare demonstrat evidens ratio, licet unum solumque, præ summâ suâ  
 mollitie, cerebrum systoli cordis pulsationem synchronam videndam exhibeat.  
 Neque enim duram meningem conspicuo donati pulsu, aut alio quàm cere-  
 bri, post apertum cranium motu agi ullatenus experienti credere licet. Hoc  
 artificio cordis & fluidorum viribus, vasa, viscera, artus obtemperant. Præ-  
 terea elastici quivis villi, quò plus distrahuntur eo fortius in contractionem  
 nituntur; desinente cordis systole, partium, fluidi tum in se, tum in vasa  
 nixus decrevit: hinc corde diastolem patiente tensi vasorum parietes resi-  
 lient, & motu priori opposito, annularium fibrarum peripheria ad axem  
 tendit; sic jam vincitur fluidum quod prius vicerat; sic arteriarum systole  
 cordis vicariâ, sanguinis fluxus conservatur, & perenni motu humores, ve-  
 locius quidem, agente corde, lentius autem, feriente, circumferuntur. Hinc  
 microscopium, cujus ope cursitantem in arteriis sanguinem paulò prius animad-  
 vertisses, paulò post eundem cespitantem & tardi-gradum exhibet. Neque  
 tantum liquidorum in orbem actorum & potentialium circumagentium, sed  
 & luctantium quarumcunque ferme virium æquilibrium natura moris amans  
 amolitur, nisi induciis & virium refectione indigeat. Musculorum motus, absque  
 ullo pulmonum concursu pectus ampliandum & constringentium, alternatim  
 sibi cedunt. Spiritu subeunte pulmo expanditur, deinde restitutione Thoracis  
 & Diaphragmatis compressus idem vitalem auram extrudit. Diaphragmatis  
 actio quidquid in abdomine continetur, premit, in arctius spatium cogit, li-  
 quida exprimit; deinde musculis abdominalibus sese restituentibus & contra-  
 hentibus visceribus obsequitur.

**I***NAEQUILIBRIUM*, sive alterutrus potentia contranitentis excessum, suis limitibus circumscribi necessum est; quos si transiliat, functionum concentus & harmonia subvertuntur. Pingamus enim cor acriori stimulo percitum fortius agi, & solito potentius imperium nancisci. Quid fiet? celerius & vividius circumagentur fluida; impetu illo vasa nimium distenta ruptionem minantur; capillaria praesertim arteriosa & nervo-lymphatica ingurgitantur, viscera inflammantur, omnia febrili aestu incenduntur, urinae flammæ fiunt, succi calelescunt: quod si morbus tandem superetur, villi tamen corporis, praegressis concussionibus fracti & atoni, vix liquida circumducere, vix corpus sustentare, vix cruda subigere, nisi post diuturnum temporis spatium queunt. Jam vero ponamus è contra, sanguinis aucta nimium mole, fluidorum renium cordis viribus ferè æquilibrari. Sanguis cordi inobsequiosus lentius circumagatur, spissior evadet, unde malorum Ilias. Consequuntur enim febres, hæmorrhagiae, artuum legnities & torpor, spiritus difficultas, aneurismata, hæmorrhoides, dysenteriae; deinde verò temporis successu, cacochymia, cruditas, resolutio sanguinis in crassam fœcem & tenue serum, viscerum obstructions, cachexia, scirrhi, polyposa concreta, aqua intercus, hydropes inducuntur. *Inaequilibrium* igitur ratio suam postulat normam, quam ultra transgredi, citrave subsistere, periculosum. Hunc, quasi medium limitem sibi forsitan finire qui fluidorum & solidorum æquilibrio sanitatem perperam tribuerunt, quod rectius dixissent *inaequilibrium*.

*Ergo sanitas non est ab æquilibrio solidorum & fluidorum.*

#### DOMINI DOCTORES DISPUTATURI.

*M. Antonius-Nicolaus Guenault.*

*M. Paulus-Jacobus Malouin,*

*M. Desiderius-Claudius Fremont, Scholarum Professor.*

*M. Bernardus de Jussieu, Regiae Scientiarum Academiae, Regiaeque Societatis Londinensis Socius, & in Horto Regio Botanices Prodemonstrator.*

*M. Joannes-Baptista Mongin, Medicus Regis ordinarius.*

*M. Michael-Procope Courcoux.*

*M. Joannes-Baptista Boyer, Regis Constitutus & in Senatu Parisiensi Medicus ordinarius.*

*M. Franciscus Mery,*

*M. Joannes-Claudius-Adrianus Helverius, Regi à Sanctoribus Consiliis, Reginaeque Medicus Primarius, & Regiæ Scientiarum Academiae.*

Proponebat Parisiis, **ANTONIUS FERREIN**,  
Aginnas, Baccalaureus Medicus. A. R. S. H. 1737.  
à sextâ ad meridiem.